



UNIVERSITÄTS-
BIBLIOTHEK
PADERBORN

Universitätsbibliothek Paderborn

Opvscvla Petri De Marca Archiepiscopi Parisiensis

Marca, Pierre de

Parisiis, 1681

I. De stemmate Christi.

urn:nbn:de:hbz:466:1-14704



T

OPVSCVLA
P E T R I
DE
M A R C A
ARCHIEPISCOPI
PARISIENSIS.

D I S S E R T A T I O
De stemmate Christi.

I.  ARIÆ ab eruditis viris initiae sunt rationes conciliandi stemmatis à Matthæo propo-
siti cum eo quod Lucas insti-
tuit in descriptione originis Iosephi, qui
fuit vitricus D. N. Iesu Christi. Inter

A

OPVS C V L A

quæ duo tam ingens & apertum est dis-
crimen ut invicem pugnare videantur;
cùm Matthæus Iosepho patrem Iaco-
bum ascribat, & hujus avos, serie non
interrupta, ab Abrahamo ad Davidem,
ab isto ad Salomonem, & stirpem Iu-
dææ Regum integrum usque ad Sala-
thielem ejusque filium Zorobabelem du-
cem ducat: quam deinde ad posteros
Abiudis, qui fuit Zorobabelis primoge-
nitus, protensam in Matthan ejusque fi-
lio, quem dixi, Iacobo sifit. At verò Lu-
cas ab ipso generis humani capite Ada-
mó exordiens, ad Abrahamum delabitur,
& ab illo deinceps ad Davidem pergit.
in quo paria facit cum Matthæo. Sed po-
stea, omissa penitus Salomonis ejusque
stirpis mentione, ad Nathanem Davidis
alterum filium descriptionem suam defle-
ctit, & ulterius progrediens, Neri pa-
trem Salathielis & avum Zorobabelis de-
signat; statimque deserto Abiude Zoro-
babelis primogenito, Rezæ alterius filii à
Zorobabele prognati stemma continua ne-
potum serie ad Heli terminat, quem Io-
sepho patrem tribuit. Ex hac Evangel-
istarum contraria in speciem descriptione
duos Iosepho patres affingere necesse est,
& alios avos atque proavos usque ad Zo-
robabelem & Salathielem; in quorum

P E T R I D E M A R C A.

3

avis eadem pugna reperitur , quos à Da-
vide per Salomonem Matthæus deducit,
& Lucas per Nathanem:

II. Non morabor in recensendis , quas
antiqui patres excogitarunt componendi
adeo gravem de duplice patre Iosephi con-
troversiam , rationibus , quæ à recentiori-
bus plerisque discussæ & partim expunctæ
sunt. Id unum observabo , necessariam
fuisse utramque descriptionem , ut ple-
nam & integrum haberemus originis istius
cognitionem , ex qua liquidò pateret Iu-
dæis atque gentilibus Christum ; cuius in
eo stemmate maiores recensentur ab A-
brahamo & Davide arcessiti , eum esse
Principem & Messiam quem ex illa duo-
rum procerum stirpe proditurum oracula
Sacra tam serio spoponderant. Neque
enim eorum sententiæ assentior qui Mat-
thæum sic origines suas Hebræis edidisse ,
Lucam verò gentilibus , sibi persuaserunt
ut solis illorum rationibus consuluisse vo-
luerint qui scriptio니 causam dederant.
Imò verò utrumque stemma ad Iudæorum
institutionem æquè ac gentilium omnino
pertinet : sed unum mutuatur lucem ab al-
tero ; ita ut quæ in Matthæo minùs erudi-
tis in antiquitate Iudaïca negotium facef-
sere poterant , à Luca , qui posterius scri-
psit , planè illustrentur.

A ij

O P V S C V L A

III. Quare jus regnandi , Abrahami & Davidis nepoti eximio promissum , cùm ad Christum pertinere Matthæus docere vellet , Davidem ipsum ejusque primogenitum Salomonem ceterosque Reges Iudæorum invicem sibi sanguinis jure succedentes proponit usque ad Iechoniam & ejus fratres , sub ipsa Babylonici exsilio tempora . Subjungit successionem principatus Iudaïci in Salathiele & Zorobabele ; qui quidem procedebant ex stirpe Davidis , jureque regnandi hereditate sibi delato , quantum per Assyrios licebat , utebantur . Hoc jus ut à Zorobabele transmissum fuit ad Abiudem primogenitum suum , ita Matthæus hujus Abiudis posteros ad Iacobum prosequitur ; à quo Iosephus vir Mariæ originem traxit , juxta fidem Matthæi .

IV. Quæ quidem licet in se vera sint , & jus regnandi ad Iosephum & Mariam , à Davide repetito initio , translatum probent ; attamen quia series generationis naturalis in ea descriptione majorum apud Matthæum bis interrupta fuerat , nempe in persona Salathielis , & demum Iacobi , quorum ille , fictione juris , filius erat Iechoniæ Regis , Iacobus vero , juris quoque fictione , erat pater Iosephi , necesse fuit ut Lucas ex his angustiis fideles

eriperet, patremque naturalem Salathie-
lis, tum etiam Iosephi ediffereret, eadem-
que opera jus regnandi à Davide dedu-
ctum rectè per eas personas quas recen-
suerat Matthæus ad Iosephum, Mariam,
& Christum transmitti nos admoneret.

V. Enimverò scriptores antiqui de so-
lo Iosephi patre solliciti, in conciliatione
Matthæi cum Luca laborarunt, quod ad
istam stemmatis partem attinebat. Neque
enim Salathielis ducis patrem alium à Ie-
chonia Rege fuisse illis suboluerat. Quare
nec illud Lucæ consilium, quod proposui-
mus, de illustranda & explicanda Mat-
thæi descriptione integrè consequi potue-
runt. Id unum apud se constituisse Lucam
voluerunt, ut doceret Nathanis stirpem
in Iosepho unà cum Salomonis progenie
coaluisse, quod significabat Iulius Africa-
nus in epistola ad Aristidem. In quo non
erat tantum momentum ut Lucæ diligen-
tia requireretur in expandenda Nathanis
posteritate; cùm juxta veterum istorum
sententiam nihil ad jus regnandi stirps illa
contulerit, quod per Salomonem Iacobo
patri, ut ipsi volunt, naturali Iosephi con-
ferri scripserat Matthæus.

VI. Hæc enim apud illos, auctore
Africano, invaluerat opinio, cùm Iaco-
bus à Matthæo & Heli à Luca pater Iose-

A iij

phi dicatur, illum naturalem fuisse, hunc
verò legitimum, vi legis, & fictione juris.
Quod ex Desposynorum traditione hoc
modo explicat Africanus apud Eusebium.
Matthan Salomonidarum stirpis solus he-
res uxorem Estham cùm duxisset, ex ea
sustulit filium Iacobum. Matthane mor-
tuo, Estha vidua nupsit Melchi ex Natha-
nis stemmate; ex quo suscepit filium He-
li; in quo uno Nathanidarum jura colle-
cta sunt. Heli verò, ducta uxore, cùm si-
ne liberis decessisset, Iacobus ejus frater
uterinus, legis imperio adactus, viduam
conjugem sibi ascivit; ex qua Iosephum
sustulit, naturalem filium suum, ut Mat-
thæus scripsit, sed vi legis Heli imputan-
dum, auctore Luca.

VII. Attamen hac in parte hallucina-
tum fuisse Africanum viri aliquot eruditio-
ne clari ante nos observarunt; & Iosepho
assignatum à Luca patrem, naturalem
fuisse, adoptivum verò & vi legis indu-
ctum quem Matthæus tradit. Quippe res
ipsa docet Matthæo curæ fuisse jura regiæ
successionis in personis à se descriptis con-
texere, exordio ducto ab Abrahamo, cui
promissiones primùm factæ sunt, Lucam
verò, qui ab Adamo auspicatur, secutum
naturalis generationis ordinem. Quod
apertè patet in Salathiele, quem à Iecho-

P E T R I D E M A R C A.

7

nia genitum Matthæus docuerat. Sed quia hoc ad principatus successionem hereditariam, non autem ad naturæ seriem pertinebat, suppetias obscurò alioqui loco tulit Lucas, & contexta Nathanis nepotum serie, ad Neri progressus est verum Salathielis patrem. Idem institutum secutus est in Iosephi patre naturali demonstrando. Legitimum enim & ultimum Salomonidarum heredem Iacobum Matthæus dederat patrem Iosepho. Sed quia hæc pars stemmatis egebat explicatione, Lucas similem priori operam navavit; & naturali Iosephi patre quæsito, Heli esse docuit.

VIII. Quoniam vèrò vis & veluti arx istius probationis, qua contendimus Lucæ studium in eo positum ut veros & naturales patres assignaret, constituta est in patre Salathielis demonstrando, adnotandum est Ieremiam cap. xxi. Iechoniacæ Regi & deportationem in Babylonum solum & orbitatem prædixisse, ad eo ut nullus ex ejus stirpe Davidis solum infessurus vel potestatem in Iuda nacturus esset. Quare ne cassa sit oraculi sacri comminatio, nullo pacto Salathiel ut filius Iechoniacæ ascribi debet, et si Matthæus referat Iechoniam genuisse Salathielem. Gignendi quippe verbum, more loquendi

A iiiij

Hebræis familiari, non solum generatio-
nis naturalis ordinem significat, sed etiam
seriem successionis, ut docuerunt eruditæ
viri. Quod dicendi genus ut in personis
privatis mihi videtur durum, ita in regiæ
dignitatis successione sua elegantia non
caret. Inde illud psalmi de Davide in re-
gnum evecto: *Filius meus es tu, ego hodie
genui te.* Hinc apud profanos auctores
dies adepti imperii natalis dicitur. Restat
ergo ut jus regni hereditarium à Iechonia
in Salathielem devolutum significare vo-
luerit Matthæus. Capacem autem hujus
recipiendi juris Salathielem docuit Lu-
cas, utpote qui tunc temporis reperi-
tur caput stirpis Nathanidarum; in
quem, extincta Salomonis stirpe, jura regi-
ni Iudaïci & spes promissionum conflu-
bant. Quod ut facilius Lucas evincat,
subjicit oculis Nathanis posteros, priva-
tos homines, utpote qui Salomonidarum
stirpe regnante vixissent, continuata serie
usque ad Neri patrem Salathielis; ad
quem, fideicommisso à lege inducto, re-
gia hereditas Davidicæ familiæ translata
est, & deinde ad filium ejus Zorobabelem
Iudaïci populi ducem & αιχμαλωταρχην.

I X. Pari usus est diligentia Lucas in
assignando naturali patre Iosephi, ut
constans esset in suo instituto, illustraret-

que Matthæum, qui jus regiæ successionis per Zorobabelis posteros ex primogenito Abiude prognatos prosecutus fuerat. Sed eorum ultimo Iacobo sine liberis obeunte, expandenda erat series nepotum Rezx, qui fuit secundogenitus Zorobabelis; ut constaret agnationis jure hereditatem in ultimum stirpis illius Heli devolutam fuisse, quod Lucas egregiè præstítit.

X. Neque nos ab hac sententia movere debet Africani auctoritas, cùm futili imò verò etiam inepto nitatur fundamento. Ait ille à Matthæo tradi Iacobum genuisse Iosephum, à Luca verò Iosephum existimatum fuisse patrem Christi, Iosephum autem filium fuisse Heli. Sed verbum illud fictionis ad solum Iosephum pertinet, ratione Christi, cuius existimabatur esse pater, non autem ratione ceterorum qui in eadem serie ad Adamum usque describuntur. Gignendi autem verbum, apud Matthæum, vel ad jus successions à Iacobo ad Iosephum deductæ pertinet, ut dicebamus superiùs, quamvis in privatis hominibus hæc locutio durior videatur, vel potiùs filium legitimum, id est, vi legis adscriptum designat.

XI. Posset aliquam molestiam facesere Desposynorum traditio apud Africanum, qui videntur naturalem patrem

Iacobum agnoscere , Heli autem legitimum. Sed ausim afferere detortam ab Africano in alium sensum hac in parte antiquam narrationem , vel ejus rei famam temporis lapsu adulteratam ; præsertim cùm Ambrosius lib. 111. in Lucam , se alium antiquorem secutus auctorem , Heli naturalem patrem fuisse scripserit , Iacobum autem legitimum.

XII. Ceterūm qua ratione acciderit ut alter natura , fictione juris alter , Iosephi pater fuerit , egregiè nos docent iidem Desposyni apud Africanum ; quorum auctoritatem elevare conati sunt quidam è recentioribus , quorum apud eruditos fama est illustrior. Illi verò , robusto in speciem argumento , sibi visi sunt hanc fabulam evertisse. Quippe cùm habeamus ex Africano Iacobum & Heli patres fuisse uterinos ex communi matre Estha , Heli autem improlem obiisse , Iacobum verò ejus duxisse viduam legis imperio adactum , ut demortuo fratri prolem suscitaret , reponunt illi prudenter & acutè legem *Deutero. xxv.* de solidis fratribus consanguineis constituisse ad conservanda familiarum jura , quæ ex sola agnatione censentur. Fratres autem uterini non sunt inter agnatos , neque , ut disertè scribit Moses Maimonides , in

*causa ducendæ patriæ aut hereditatis cer-
nendæ pro fratribus habentur.*

XIII. Attamen grave mihi semper visum fuit ab ea traditione discedere quafulti veteres patres gentilium calumnias ob pugnas Matthæi & Lucæ in assignando duplici patre Iosephi diluerunt. Nolo in universum reluctari priori definitioni, quæ fratres uterinos ab hereditate fratris & à nuptiis fratriæ viduæ removet. Sed aio ejus regulæ exceptionem dari in specie proposita; adeo ut, nisi daretur huic exceptioni locus, lex Deuteronomii corrueret. Quare, hoc casu, exceptio est potius ipsa legis executio. Fingamus, ut accidit, absque liberis obiisse Iacobum ultimum ex nepotibus Zorobabelis per Abiudem genus ducentibus. Statim jus hereditatis regiæ devolutum est ad Heli; non quatenus erat Iacobi frater uterinus ex matre Estha, sed quia solus erat heres ex posteris Zorobabelis per Rezam secundo-genitum. Quare cùm Iacobi hereditas ipso jure translata sit in Heli fratrem, licet uterinum, & verbis & mente legis obstrictus fuit iste ad ducendam Iacobi viduam: cuius matrimonii onus unà cum hereditatis honore conjunctum fuit, si fraternali vinculum intercederet; non distinguente lege an sint uterini vel con-

sanguinei , dummodo cum isthuc onere
sit conjuncta hereditas.

X I V . Hujus autem connubii legis
imperio initi is erat effectus ut proles edi-
ta jure ipso tribueretur fratri defuncto ;
adeo ut filius & heres illius censeretur.
quod significant hæc verba Deutero. xxv.
Suscipiet eam (id est , viduam) frater ejus ,
& suscitabit semen fratris sui , & primo-
genitum ex ea filium nomine illius appella-
bit. Etenim non est horum legis verbo-
rum sententia , ut quidam putant , inter
quos Augustinus , imponendum filio pa-
tris nomen , sed filium defuncti nomini as-
cribendum , dicendumque illius patris fi-
lius & heredem . Quam explicationem
confirmat Boosus cap. i v. libri Ruth , qui
fratris sui Mahalon absque liberis fato
functi viduam Rutham cùm duxisset , ait
coram concione : *Testes vos estis hodie*
quòd Ruth Moabitidem , uxorem Maha-
lonum , in conjugem sumpserim , ut susci-
rem nomen defuncti in hereditate sua , ne
vocabulum ejus de familia & fratribus &
populo deleatur. Nomen ergo defuncti ser-
vabatur , dato illi herede & filio , qui in
tabulis censualibus filius illi adscribeba-
tur . Ceterùm naturalis quoque patris
ratio habita est , ut illius etiam filius di-
ceretur , sicque duorum patrum in soli-

dum natus esset ; potiore , ni fallor , pa-
tris naturalis nomenclatura , quæ fictioni
juris antecellebat. Quod unicè docet
eiusdem Boosi exemplum , cuius filius è
Rutha fratris Mahalon vidua , non istius
appellationem obtinuit. Obedus quippe
dictus est. Neque etiam à Matthæo in
stemmate dictus est filius Mahalon , sed
Boosi. Vnde colligemus Iosephum rectè
dici Iacobi filium vi legis & fictione juris ,
sed jure sanguinis & naturæ Heli filium
indigetandum , atque adeo utriusque pa-
renti adsignandum.

XV. Antequam ad secundum dispu-
tationis articulum accedam , monendi su-
mus , ex Africani sententia , Melchi tri-
buendum esse patrem filio Heli , & avum
Iosepho , apud Lucam ; ita ut , hac ad-
missa sententia , duo ex vulgatis editioni-
bus tam Græcis quam Latinis expungen-
da sint nomina in stemmate Lucæ , nem-
pe Matthath & Levi , totidemque gene-
rationes. Sanè non dubito quin varia fue-
rit olim lectio apud codices Lucæ , his
duo illa nomina omnittentibus , unde oc-
casio scribendi Africano Melchi esse pa-
trem Heli , & Irenæo septuaginta duas
generationes tantùm apud Lucam agnosc-
endi , quæ sunt hodie septuaginta quin-
que , aliis verò exemplaribus duos illos

avos Iosephi describentibus ab ipsa Gregorii Nazianzeni ætate , qui Matthath & Levi inter Melchi abavum & Heli abnepotem interserit. Quæ ultima lectio cùm & ipsa vetustate juvetur & Latina veteri editione , non est quòd viri eruditii in ea sollicitanda , quæ per tot secula obtinuit , sibi laborandum putent ; ut rectè monuit R. P. Rossinus adversus Hugonem Grotium & Ioannem Cordesium;

XVI. Secunda hujus illustris controversiæ disceptatio versatur in detegendo Mariæ stemmate , à qua Christus ex Davide per carnem ortus est, ut monuit Paulus Apostolus. Sanè neque Matthæus neque Lucas munere suo functi essent , si Christi originem & generis successionis que seriem alter ab Abrahamo & Davide , alter ab Adamo exorsi , in solius Iosephi pandendis majoribus hæsisserent , incuriosius obliiti Mariæ generis ; à qua sola , non autem à Iosepho , suum genus traxisse Christum utrique profitentur. Sciebant à se hoc officium Christianis præstari debere. Quare in ipso evangelii sui exordio Matthæus pollicetur se Christi originem descripturum. Non est detrahenda fides auctori tam idoneo , nec dubitandum quin promissa impleverit.

XVII. Id solum inquirendum restat ,

quem modum consilii sui exequendi tenuerit, in quo veterum & recentiorum ingenia desudarunt. Qua de re nihil video quod certius & sincerius afferri possit quam id quod plerique veterum adnotarunt, scilicet apud Matthæum eosdem esse majores Iosephi & Mariæ; adeo ut stemma unius pertineat ad alterum, & per utrosque ad Christum, quamvis diverso gradu. Duo sunt capita in hac definitione. Primum est apertum ex verbis Matthæi, scilicet originem Iosephi eandem esse cum origine Christi, hanc verò per Mariam derivari in Christum, ac proinde ipsius Mariae avos eosdem esse cum parentibus Iosephi.

XVIII. Alterum caput reticetur à Matthæo, nempe quo gradu distarent à communis stipite Iosephus & Maria, quia res erat illa tempestate omnibus Iudæam incolentibus notissima. Attamen ex Epiphanii, Chrysostomi, & Ambrosii testimoniis confici potest proximiori agnitionis gradu invicem conjunctos fuisse. Etenim afferunt illi, ex veteri nempe traditione, se conjugio sociasse Iosephum & Mariam ut parerent legi, quæ puellæ Israëlitidis nuptias cum hereditate paterna, quæ illi contigerat, proximo agnato deferebat, ne bona extra familiam transi-

rent. Quod definitum fuit à Mose, *Numeror. c. ultimo*, in specie illi proposita; ubi enuptio extra tribum vetita, de stirpe & familia debet intelligi, ut rectè à veteribus edissertum est, tribus nomen ad familias significandas restringendo. Ut autem hoc loco familia designata intelligatur, exigit ratio legi addita, ne bona avita perpetuo jure ad exterros deveniant. Hinc est quòd *c. III. Tobiae* Sara conqueritur quòd pater ipsius filios heredes non haberet, neque verò esset frater ei cuius filio se uxorem ex lege servaret, Iudithæ quoque maritum ejusdem fuisse cum ea non solum tribus, sed etiam stirpis, & familiae, πατριῶν αὐτῆς, inquit historiæ illius scriptor. quam vocem, *patriæ*, Ambrosius in nostræ legis explicatione retinuit. In *Ioseph origine*, inquit, est etiam origo *Mariæ*. Nam cùm vir justus sit *Ioseph*, utique & ex tribu sua & ex patria sua accepit uxorem; nec potuit justus facere contra id quod lege præscriptum est. Sic enim habet. *Quia unusquisque in hereditate tribus suæ patriæ adhærebunt filii Israël*, nec de tribu ad tribum transibunt; & omnis filia quæ habet hereditatem tribuum filiorum Israël, uni ex populo & tribu patris sui erit uxor. Legibus Atticis, quarum pleræque ex legibus Mosis desumptæ sunt, idem inventur

tur constitutum. Vocabatur autem puella talis, sive sola ex asse heres esset patri, si-
ve sorores, non etiam fratres haberet, vulgo ἐπίκληνες, ab ipso Solone ἐπίκλη-
ῆντος. Ad quem ejus nuptiæ lege pertine-
bant, agnatus proximus is dicebatur, ἐπι-
δικαζόμενος, ut eruditè probat testimentiis
Diodori Siculi, Demosthenis, Isæi, Ari-
stophanis, Pollucis, & Terentii Grotius,
& nuperus legum Atticarum collector.

XIX. Ceterùm jus istud non perti-
nuit ad omnes puellas, sed ad eas quæ re-
rum soli hereditatem adirent. Quippe aliis
liberum fuit extra tribum suam nuptias
contrahere. Vnde in libro Iudicum c. xxi.
tribus ceteræ, quò minus filias suas nup-
tum darent Benjaminitis, ostendunt se
non lege divina, sed jurisjurandi religione
prohiberi. Et David ex tribu Iuda Micho-
lem duxit uxorem, quæ fuit ex tribu Ben-
jaminis, nunquam eo nomine reprehensus.
Adjici debet ex Iosepho, potuisse
quas vis virgines cuvis Hebræo nubere, si
hereditatem sibi delatam repudiarent. Ex
superiori observatione colligitur, non so-
lum ejusdem stirpis & familiæ paternæ
fuisse Iosephum & Mariam, sed etiam
proxima agnatione invicem conjunctos
fuisse, cùm ille istam ducere teneretur
uxorem ex lege.

XX. Quonam autem gradu agnatio-
nis se invicem contingerent, indicare co-
natus est Ioa. Baptista Poza Cantaber,
Soc. Iesu Theologus, *Lib. II. Elucidarii*
Deiparae Traictatu **III.** c. 1. his verbis:
Deipara & Iosephus, fratrum duorum filii,
eisdemque paternis avis gaudebant, aut
saltem proavis. quod arbitror esse necessa-
rium ad mentem Evangelistæ. Sed agnatio-
nis gradum illum societatis ejusdem alter
Theologus eruditione clarissimus Possinus
in Dialactico suo Theogenealogico de-
demonstravit, & reliquas quæ in hoc stem-
mate occurrunt difficultates diligentissi-
mè discussit. Securus itaque alterius ex
eadem societate eruditissimi viri Beffoni
sententiam, liquidis argumentis compro-
bavit Heli communem patrem fuisse Ioa-
chimi & Iosephi; quorum ille pater, hic
vir fuerit Mariæ. Etenim, ut superiùs mo-
nui, cùm Evangelistæ Christi genealo-
giam describendam sibi proposuerint, il-
lud quod agebant egisse seriò pius quisque
in animum inducit. Porrò non describent
majores Christi, nisi priùs majorum Ma-
riæ seriem ediderint. Eos verò alios à ma-
joribus Iosephi fuisse non significant. Er-
go cominunes censendi sunt ambobus.
Vnde sequitur, quemadmodum ex Heli
Iosephus prognatus est, ex eodem stipite

Mariam quoque proficisci. Cùm autem Iosephus Mariam duxerit, & jus fasque naturale vetet fratrem cum sorore sua jungi connubio, necesse est ut inferiori gradu Maria posita fuerit, neptisque illi fuerit ex Ioachimo fratre. Quod satis significat Matthæus, qui Iosephum superiori quām sit Maria gradu constituit.

X X I. Addamus huic argumento robur aliquod, petitum ex comparatione utriusque stemmatis apud Matthæum & Lucam. Posita enim priore illa certissima definitione, ab utroque Evangelista Christi majores describi, alia ratione conciliari non potest varia eorum descriptio quām si dicamus Heli patrem Iosephi apud Lucam, & Iacobum apud Matthæum, inter Mariæ & Christi majores numerari. Etenim si ex avo vel proavo Heli procedat linea Mariæ, vel è contrario ex avo Iacobi, alia erit generis series quæ dicit ad Heli vel Iacobum, & abi iis ad Iosephum. Linea autem illa Mariæ nulla ratione pertinet ad descriptionem majorum Christi relatam à Matthæo vel Luca. Scio rectè excipi posse, utramque Evangelistarum descriptionem conciliari admissa duplicitis patris legalis & naturalis observatione in personis Heli & Iacobi. Sed cùm isthæc conciliatio cadat in solos Iosephi patres;

B ij

vel illi numerandi erunt inter majores Mariæ & Christi, vel alterius Evangelistæ narratio nihil conferet ad genealogiam Christi. quod absurdissimum esse ante diximus.

XXII. Nihil est quod huic sententiæ objici possit præter jus naturæ; cui videtur injuria fieri si admittantur nuptiæ inter Iosephum patruum & Mariam fratris Ioachimi filiam. Attamen ejusmodi conjugium nec lege Iudæis vetitum, & moribus receptum erat; ut eruditè docuit Possinus. Sic Abraham Saram, fratris sui Arani filiam, uxorem duxit, ut docuerunt Iosephus & Hieronymus. Othoniel Axam duxit fratris filiam *Iudic. c. i.* Et apud Tobiam *c. 111.* Sara unigenita patri suo se obstrictam fatetur ex lege ad nubendum nepoti ex fratre nato, si quis extaret. Mardochæus, illo exemplo, filiam fratris sui Edissam, Estherem deinde dñam, sibi adoptavit in filiam, ut reddit Latinus interpres, vel ut septuaginta explicuerunt, *despondit eam sibi in uxorem.* Estheris *c. 11.* Alio jure usi sunt Iudæi in connubiis amitæ vel materteræ cum filio fratris, quæ vetita sunt *Levit. c. xxv.* quia cum uxor sub manu sit & potestate viri, alienum videtur à jure naturæ ut amita, quæ vicem matris implere deberet.

erga filium fratris, isthac auctoritate dejecta illi subjiciatur. Porro et si Romano-rum Principum legibus nuptiae patrui cum nepte sunt vetitae, ab aliis gentibus absque crimine olim frequentatae sunt, ut apud Tyrios Iudeis vicinos ex Iustino lib. xviii. apud Macedones ex Diodoro, Lacedæmonios ex Herodoto, & Siculos ex Plutarcho. Quare non solum adversus legis præscriptum non peccavit Maria, patrum Iosephum ducendo; sed contra legem peccasset, nisi eum sibi sociasset connubio.

X X I I I. Discutienda nobis restat Græcorum mediæ ætatis narratio, à Ioanne Damasceno tradita, Mariæ patri Ioa-chimo patrem fuisse Pantherem, huic Barpantherem, Barpantheri vero patrem fuisse Levin, filium Melchi. Quæ fama vi-tio temporis adulterata, vero tamen com-mista est. Pantheris agnomentum quin fa-miliæ Iosephi inhæserit, dubitare non si-nit Celsi apud Origenem adnotatio; qui ait Mariam concepisse à quodam nomine Panthera, *πάνθης Παρθέα τοῦ ρωμα.* quod paganus ille à Iudeis acceperat, in quo-rum veteribus monumentis Christus filius Panther dicitur. Itaque Panther est genti-litum cognomentum, non autem viri proprium. Quod etiam patet ex Epipha-

B iij

nio, qui Iacobum patrem Iosephi, apud Matthæum, cognomine Pantherem dictum fuisse docet. *Iosephus*, inquit, filius fuit τὸς Ἰακὼς, ἐπίκλην τῷ Πάντηρ καλεσμένος. Quare manifesta est Græcorum apud Damascenum hallucinatio, quod familiæ cognomentum pro nominibus propriis avorum Mariæ usurparint.

X X I V. Sed gravius peccarunt in eo quod adversus vetustam traditionem Pantheris cognomen ex linea Melchi à Luca recensiti deducant, cum ex Epiphani longè antiquioris testimonio constet cognomen illud in familia Jacob coalusse. Ex hac in domum Heli unâ cum hereditate agnationis jure translatum fuisse dicendum est: quod ab Heli assumptum, in Iosephum quoque devolutum est. Quare Joachimi pater uterque Panther dictus est, seu Jacob, qui legitimus, seu Heli, qui naturalis, assumpta gentilitia appellatione Iacobi. Ipsius vero pater Matthan, accepto, si placet, etiam à progenitoribus cognomine Pantheris, sive Barpantheris, usus fuisse credi potest. Cœperant quippe apud Iudæos, jam à Macchabæicis temporibus, cognomina quædam gentilitia, a casu vel alicujus rei memorabilis eventu deducta, in familiis usurpari.

XXV. Occurrunt præterea quæstiones aliquot non contemnendæ , tum in stemmate à Luca proposito , tum in eo quod exhibet Matthæus : quæ copiosa dissertatione indigerent , nisi Patris Pos- fini opera factum esset ut in iis nobis non sit valde laborandum. Tres tantùm attin- gam ; quarum prima inquirit quodnam fuerit consilium Matthæi in dirigendo stemmate in tres tessaradecadas. Non vi- detur mihi numerorum subtile & scrupu- losas rationes consecutus , ut placuit eru- ditis quibusdam , qui mysteria in hoc qua- tuordenario numero hariolantur. Id unum sibi proposuit , ut memoriæ juvandæ cau- fa stemma in tria tempora digereret , quæ egregiis epochis distinxit , ante regnum , regni florentis , & regni desinentis ; rur- sumque ternis his ordinibus personas pari numero adscripsit. Enimvero quoniam in prima serie Abrahami ad Davidem qua- tuordecim personæ revera tantùm com- prehensæ erant , eundem numerum in re- liquis duabus classibus servavit. Ideoque in eo quod est à Davide ad Iechoniam in- tervalle tres Reges omisit , Ochosiam , Ioasum , & Amasiam , ne quatuordena- rium numerum superaret. Nec putavit hi- storiæ fidem violari , personas quasdam minùs nobiles arbitrio suo transiliendo ;

B iiiij

quia rem in summam conferebat. Cujus præteritionis exempla habemus lib. I. *Paralip.* i v. & apud Solinum in Macedoniæ Regibus. Ceterùm recti sermonis ratio salva erit, etsi Rex Ioram, omissis intermediis, genuisse dicatur Oziam: quia genuisse non tantum pater filium, sed & avus nepotem, & pronepotem proavus, absque ullo vitio dicitur.

X X V I. Porrò cur tres istos Reges silentio præ ceteris damnaverit Matthæus, causa est in promptu, rectè à veteribus adnotata; quia peccatis suis exigentibus hanc infamiam commeruerunt. Quippe Ochosias *ambulavit in viis domus Achab*, ut loquitur scriptura iv. *Reg. c. viii.* Joas verò Zachariam Pontificem Joiadæ filium lapidavit in atrio templi, i i. *Paralip. c. xxiv.* Amasias deos Idumæorum coluit, ejusdem libri c. xxv. Excipiet aliquis repeiri tres alios Judææ Reges sceleribus insigniores, qui multandi potius oblivione fuerant à Matthæo. Achas scilicet, qui templum polluit omni genere idolatriæ & filium suum sacrilego parricidio concremavit, Manasses, qui in scripturis Amorrhæos ipsos impietate superasse dicitur, quam filius ejus Amon in majus auxit; ut habemus ex diserto testimonio auctoris *Paralipomenon.*

XXVII. Huic difficultati facile satisfiet , si dicamus expunctionem istam numero trium Regum adstrictam fuisse ut servaretur quatuordenarii ratio , in eligendis autem tribus è sex illis sceleratis merum fuisse arbitrium Matthæi : qui in priores illos tres , qui propius absunt à Davide , cùm in recensenda Regum stirpe priùs incidisset , illique seriatim se consequantur , non habuit cur se curiosius implicaret expendendis ceterorum sceleribus , etsi dici possit causam aliquam fortasse habuisse , licet suo instituto non necessariam , cur trium ultimorum nomini parceret , Achaso quidem ob Ezechiae filii & heredis pietatem eximiam , Manassi ob resipiscientiam , Amoni ob Iosiae filii celebratum in religione vindicanda studium . Quæ Matthæi explicandi ratio à nobis proposita facilior & planior est quàm eruditissimi viri nobilis conjectura , qui putat tres illos Reges à Matthæo prætermisso quòd ob scelera sua judicio sacerdotum expuncti essent è tabulis censoribus , quæ in archivis templi summa cura à Pontificibus servabantur ; ubi , teste Iosepho , præter rerum gestarum memoriam , origines quoque familiarum regiæ & sacerdotalis descriptæ erant . Sed an Pontificibus & synedrio tanta fuerit in

Reges etiam fato functos potestas ut eo-
rum memoriam damnarent , nomenque è
Fastis eraderent , ut olim factum legimus
à senatu Romano , prudenter dubitari po-
test , & illud quoque , si licuerit illud sy-
nedrio , an unquam usurpaverit.

X X V I I I . Secunda , quæ sequitur
ex prima , est quæstio illa nobilis de nu-
meri quatuordenarii apud Matthæum
supputatione , quomodo sit ineunda ut
auctori sua ratio constet docenti singulas
classes constare generationibus sive per-
sonis quatuordecim . Difficultas versatur
in persona Iechoniæ Regis , qui dicitur à
Matthæo filius Iosia in transmigratione
Babylonis , & genuisse Salathielem post
transmigrationem . Non constabit autem
numero summa , nisi præter Iechoniam
pater illius Ioakimus inseratur , & Iecho-
nias det exordium tertiae tessaradecadi .

Antequam nodum istum solvamus ,
pauca & certa ex scriptura præmittenda
sunt de filiis Iosia & de Babylonicae de-
portationis tempore . Interfecto Iosia
Regi in prælio Mageddonensi ab Ægyp-
tiis suffictus est filius Ioachaz , dictus quo-
que Sellum : qui paulò pòst exutus regno ,
obiit captivus in Ægypto . Victor Pharaon
fratri successorem dedit alterum Iosia fi-
lium , qui Eliakim & Ioakim nuncupar-

tus est. Hic regnum per annos undecim varia fortuna tenuit. Ab Ægyptiorum servitute discedens, Nabuchodonosori Regi Chaldaeorum cum sese addixisset, fidem jam datam violare tentans, Syrorum & vicinarum gentium, quæ sociæ Chaldaeis erant, incursionibus vexatus, inter tot discrimina fato functus est. Regni atque defectionis heredem reliquit filium Ioachinum, Iechoniam dictum à Ieremia, natum annos octodecim, qui contumaciæ paternæ pœnas luit, tribus in principatu mensibus exactis, deportatus Babylonem cum omni familia post Hierosolymitanæ turbis deditio[n]em præsenti Nabuchodonosori factam. Iechoniae loco, regni speciem potius quam vim à Chaldaeis obtinuit Sedecias, Iosiae filius, & patruus Iechoniae, qui post annos undecim, oculis effossis, abductus est Babylonem.

Itaque sub extrema tempora regni Iokimi & exordia Iechoniae initium hujusce transmigrationis fuit: quæ post annos undecim, incenso templo, urbeque excisa, totius populi unâ cum Sedecia Rege in Chaldaeam deportatione, nomen transmigrationis depositum, appellatione captivitatis Babylonicae assumpta. Quare Matthæus rectè tempora inceptæ transmigra-

tionis ad Iechoniam retulit, & Salathielis ducatum ad id tempus quod eam consecutum est, ante solutionem captivitatis, quam Cyri beneficio Iudæi tandem obtinuerunt.

X X I X. Recentiores omnes in unam conspirant sententiam, mendosum esse codicem Matthæi, & Ioakimum patrem Iechoniæ omissum in secunda classe. Hanc labem observasse Epiphanium hær. VIII. & Hieronymum initio commentariorum in Danielem, atque Euthymium ad Matthæum c. i. Duplici argumento mutilum esse locum demonstrant. Primò, quia Iechonias fuit nepos Iosiac, non autem ejus filius. Vnde colligitur veram lectionem ita constitui debere ut dicatur Iosias genuisse Ioakim, hunc autem genuisse Iechoniam. Secundò, quia nisi constituatur altera persona præter Iechoniam, qui limes fuit secundæ tessaradecadis, tertia intra numerum tredecim capitum subsidet.

X X X. Ego verò tria quædam assero, nec locum Matthæi mendosum esse in secunda classe, neque à veteribus ullis, non excepto Epiphanio, lectionem ho diernam fuisse damnatam, licet recentiores omnes id sibi omnino persuaserint, & ex ea quatuordenarium numerum tertiaræ classis rectè colligi ex Hieronymi & Am-

brosii sententia. In prima hujus assertionis parte mihi convenit cum erudito viro Pos-
fino, qui pluribus contendit & probat Matthæi editiones omnium linguarum at-
que manuscriptos codices vetustissimos,
(non exceptis, ut à viris fide dignis acce-
pi, duobus illis venerandæ antiquitatis co-
dicibus Græcis qui servantur in Anglia)
lectionem vulgatam præferre. Quod enim
vir omni laude superior Dionysius Peta-
vius refert lib. ix. de Doctr. Temp. c.
xviii. in vetustis membranis bibliothè-
cæ regiæ adnotatum ad marginem reperiri
Iosiam genuisse Ioacim, & istum genuisse
Iechoniam, glossema fuit eruditæ cuiusl-
dam viri, non autem varia lectio textus;
ut rectè monuit Possinus. Quod autem ob-
servavit Ioa. Faber Stapulensis in codice
antiquissimo Græco Ioacim pro Iecho-
nia legi in secunda classe, cùm ea lectio
repugnet Epiphanius testimonio, qui sua
ætate Iechoniæ nomen, non autem Ioa-
kimi, in evangelio lectum testatur, nec
conqueritur de ulla interpretatione inibi
facta, lectio Stapulensis sine dubio sapit
glossema eruditæ lectoris.

XXXI. Non sufficit autem lectionis
veritatem confirmasse, nisi ejus quoque
sententiam statim subjunxero. Quod eò
lubentiūs aggrediar quoniam ex ejus ex-

plicatione patebit mens genuina Matthæi & antiquorum patrum. His ergo verbis, *Iosias genuit Iechoniam & fratres ejus in transmigratione Babylonis*, significat Matthæus Iosia liberos qui regnum obtinuerunt, scilicet Ioachazum, qui obiit improlis & captivus in Ægypto, Ioakimum patrem Iechoniæ, & Sedeciam. Porrò Ioakim alio nomine Iechonias dictus est per nominis Ioakim extensionem. Pater verò fuit Ioachin; qui & Iechonias, eadem nominis Ioachini extensione, appellatus est.

Porrò Ioakim, sive Iechonias primus, variis bellorum calamitatibus oppressus, ex quibus secuta est transmigratio in Babylonem, tribus ante illam mensibus obiit; & sic ad illius usque initia superstes fuit. Eleganter itaque secundam classem & quatuordenarium illius numerum Ioakimo sive Iechonia primo conclusit Matthæus, cuius limitem in transmigrationis iniciis defixit. *A David usque ad transmigrationem Babylonis generationes quatuordecim.* Quare nullum Regis caput in secunda ista classe inseri potest, ut tentatum à recentioribus, qui sic restituendam lectionem putant: *Iosias genuit Ioakim sive Iechoniam & fratres ejus.* *Ioakim autem, seu mavis Iechonias, genuit Iecho-*

niam. Quippe si vel Ioakimus per vim intrudatur, vel Iechoniæ nomen in ea classe repetatur, unitas redundabit supra summam, & quindenarius numerus exibit pro quatuordenario. Quod Porphyrio in supputatione tertiae classis Matthæum calumnianti veram objurgandi causam in secunda præbuisset.

Iechonias autem, in tertia classe post transmigrationem commemoratus, est nepos Iosiae, filius Iechoniæ primi sive Ioakimi; à quo deductus numerus, & desinens in personam Christi, quatuordenarium plenum efficit, ut mox dicemus.

XXXII. Sententiam illam nostram hausimus ex ipsis Epiphanii verbis; tantum abest ut inde occasionem sumpserimus inferendæ alterius personæ in secunda classe, ut tentarunt ceteri. Proferam auctoris locum: qui cum professus esset à Matthæo in tres ordines distributam fuisse generationum descriptionem, quorum singuli quatuordecim personis constarent, addit: οἱ δέοντες σημεῖοι ταφῆσθαι, μηδεπιτάσσεται τοις Ιεχωνίου τοις Χρονίοις. Τοις γαρ τοις Ιεχωνίου τοις Χρονίοις. Duo priores numeri liquidi sunt, nullam imminutionem patientes. Ad Iechoniam enim exacta constat personarum & temporum summa.

Quæ sequuntur apud eundem auctorem, perplexa quidem sunt; sed quæ ad tertiam classem pertinent, de qua nulla est hodie apud eruditos lectionis in Matthæo sollicitandæ controversia. Ait enim tertiam seriem quatuordenarium non implere, sed ad tredecim personas restringi: *Nimirum, inquit, quidam Iechoniam Iechoniæ alteri continuatum offendentes, repetitum alterum existimarunt. quæ tamen non erat repetitio, sed numerus exactus.* Patris enim adjecto nomine, dicebatur Iechonias Iechoniæ. *Quidam ergo, veluti elegantia causa, alterum nomen imperite expungentes, propositam ter quatuordecim capitum summam & mutuam trium inter se classum habitudinem aboliverunt.* Hujus loci à nemine hactenus, ut puto, intellecti hæc est sententia, antiquam apud Matthæum lectionem hanc fuisse: *Post transmigrationem Babylonis, Iechonias Iechoniæ genuit Salathiel.* qua significabatur Iechoniam secundum, filium Iechoniæ alterius in secunda classe descripti, genuisse Salathiel. Vnde conseguebatur Iechoniæ secundi generationem fuisse caput generationum hujus tertiae classis, quæ hoc pacto quatuordecim generationibus constabat. Quare non immerito carpit eorum temeritatem qui emendatione importuna

tuna Iechoniæ patris nomen delentes, generationis Iechoniæ secundi omissa mentione, occasionem præbuerunt duas personas in unam commiscendi, & tredecim tantum generationes tertiae classi imputandi.

XXXIII. Sanè omissa mentio generationis Iechoniæ secundi, ipsum quoque Augustinum traxit in errorem. Quippe existimavit unum eundemque Iechoniæ bis numeratum, & imputatum secundæ & tertiae classi: quemadmodum accidit quando ab ordine recto deflectitur. id enim quod est in angulo, bis numeratur. Enimverò quoniam reponi poterat, in describenda generis serie à patre ad liberos numerationem per lineam rectam fieri, non autem per transversam, à sensu tropologico subsidium petit, aitque à Iechonia factam fuisse in extraneas gentes deflexionem quando in Babyloniam transmigratum est, *lib. 11. de consens. Evangel. c. iv.* Hæc quoque generationis omissione negotium facessit Chrysostomo, ut inferius ostendemus.

XXXIV. Attamen licet Epiphanius expostulationem adversùs male feriatos correctores amplectar, non tamen cum eo demittendum animum puto quin locus veritati supersit post imperitam illam

C

emendationem. Supplendum enim erit interpretatione petita ex Scripturis quod minùs liquidò explicare videtur hodierna lectio. Itaque Iechoniam Iosiae filium eundem esse dicemus cum Ioakimo; præser-tim cùm fratres habuisse dicatur, nempe Ioachazum & Sedeciam, qui nulli fuerunt Iechoniæ secundo. Porrò Ioakimus tribus mensibus obiit ante transmigrationem. Quare non potuit post transmigrationem genuisse Salathielem. Vnde apertè conficitur hunc Iechoniam secundum alium fuisse à primo, atque adeo primi filium, quod manifestè docebat antiqua illa lec-tio ab Epiphanio commemorata; qua duce errari non potest. Et licet deleta fuerit ab imperitis criticis, manet tamen li-tura & ratio quæ discrimin utriusque Ie-choniæ nos apertissimè docet.

Omissa est itaque mentio generationis primæ in numero quatuordenario tertia classis, sed non personæ. Quare fidem suam implevit Matthæus, apud quem vox γενεᾶς generatam personam significat, ut loquar cum Iurisconsultis, quorum hæc est definitio: *Semper generata persona gra-dum adjicit.*

XXXV. Hac ratione refellit Hieronymus impium illum Porphyrium, qui falsi arguebat Matthæum quòd professus

in tertia tessaradecade , sicut in duabus reliquis , se quatuordecim generationes edidisse , in decima-tertia hæserat , oblitus decimæ-quartæ. Ait enim Hieronymus alium esse Ioakim filium Iosiae , in quo definit secunda classis , & alium Ioachin filium Ioakim , à quo incipit tertia , sicque promissis stetisse Evangelistam numerando quatuordecim personas. Hæc sunt illius verba initio commentariorum in Danieliem : *Ioakim filius Iosiae regnauit super tribum Iuda & Ierusalem annis undecim ; cui successit in regnum filius ejus Ioachin , cognomento Iechonias ; qui tertio mense regni sui , die decimo captus est à Ducibus Nabuchodonosor , ductusque est in Babylonem : & in loco ejus constitutus est Sedechias , filius Iosiae , patrius ejus ; cuius anno undecimo Ierusalem capta atque subversa est. Nemo igitur putet eundem in Danielis principio esse Ioakim , qui in Ezechielis exordio Ioachin scribitur. Iste enim extream syllabam chin habet , ille kim ; & ob hanc causam in evangelio secundum Matthæum videtur deesse generatio , quia secunda teosægades in Ioakim definit filio Iosiae , & tertia incipit à Ioachin filio Ioakim. Quod ignorans Porphyrius calumniam struit Ecclesiæ , suam ostendens impenitiam , dum Evangelistæ Matthæi arguere*

C ij

*niti*tur falsitatem. Egregium sanè testimoniū , quo refelluntur qui vitium subesse putant in contextu Matthæi , & omis-
sam inter exscribendum clausulam Ie-
choniam à Ioakimo generati. Quippe Hiero-
nymus profitetur apertè secundam clas-
sem desivisse in Ioakimo filio Iosia , &
tertiam incepisse à Ioachino superioris
Ioakimi filio. Deinde si lectio se habuisset
apud Matthæum ut eam restituendam pu-
tant eruditī , illa una generatio , quæ de-
esse videbatur , non defuisset. quippe di-
sertis verbis concepta in textu. Quòd au-
tem observat Hieronymus in fine classis
secundæ Ioakimum Iosia filium ponī , &
in exordio tertiae Ioachinum Ioakimi fi-
lium , non eò pertinet ut illis nominibus
designati putentur à Matthæo , qui utrum-
que Iechoniam nuncupavit ; sed ut sciatur
discrimen inter utrumque , patrem & fi-
lium ; etiamsi cognomines sint in contextu
Matthæi , & in libris Regum unius tan-
tum litteræ sono differant.

XXXVI. Hanc nominum Hebrai-
corum differentiam , Ioakim , & Ioachin ,
non animadvertisit Ambrosius. Vedit ta-
men in communione nominis divisionem
patris & filii lib. III. in Lucam tam li-
quidis verbis ut mirari subeat cur recen-
tiores ejus mentem non ceperint , vel

ab ea sibi recedendum putarint. *Duos*
Ioachin, *hoc est*, *duos Iechonias* fuisse hi-
storia indicat, unum ante transmigratio-
nem, alterum in ipsa transmigratione gene-
ratum, *id est*, *patrem*, & *filium*. Ergo pa-
ter inter generationes superiores est compu-
tatus, qui successit *Iosiae* filius inter poste-
riores, qui successit patri, *id est*, *nepos Io-*
siae. Mox: Non igitur suppressit alterum
Evangelista, sed utrumque signavit, quod
uterque *Iechonias* dictus sit.

XXXVII. Amplexi sunt quoque
nonnulli è veteribus Græcis hanc inter-
pretandi Evangelistæ rationem, ut docet
Nicetas Episcopus Serrarum in commen-
tariis ad Matthæum ex editione Tolosana
à Balthasare Corderio adornatis: *Aiunt*
quidam alium esse ante captivitatem Ie-
choniam, & *alium post captivitatem*. *Ille*
enim filius erat Iosiae; *alius autem post cap-*
tivitatem genitus, *ex ipso Iechonia etiam*
dicto. (Corrigendus est textus Græcus,
& sic vertendus: *alius autem post capti-*
vitatem, *illius nepos*, & *filius Iechoniæ*
jam dicti) *Hunc igitur ultimum Iecho-*
niam in tertia parte aliis, & Christo an-
numerantes, quatuordecim illas generatio-
nes complent. Φησὶ δέ τινες ἐπεργυτῷ τὸν ωρὸν τὴν αὐχ-
μαλωσίαν Ιεχονίαν, καὶ ἐπεργυτὸν τὸν μῆναν τὴν αὐχ-
μαλωσίαν. ἐκεῖνος γὰρ υἱὸς λέων Ιωάννης: οὐ δέ τοι

C iii

ἢ αὐχμαλωσίας, αὐτοῦ ἔγραφος, καὶ Ιεχονίῳ εἰρημένης. Addendum, γάρ.) τὸν δὲ τὸ πελευταῖον Ιεχονίαν, τὸν τείτη μετεῖδι, τοῖς ἀλλοῖς, καὶ τῷ Χειρῷ σωματεύθμοιῶτες, τοὺς δικαπέσαρες γενεὰς αἰαπληγοῦσι.

XXXVIII. Meminit quoque Euthymius, in hujus loci enarratione, duplicitis Iechoniæ; quorum primum Iosiacum filium facit, alio nomine Ioacham vel Ioachas dictum, quem in libro Esdræ Iechoniam nuncupari scribit, eique eo in libro tribui, tum de ejus cum Amital connubio, tum de ætate viginti trium annorum, & de regno trium mensium, quæ in libris Regum & Paralipomenon Ioachazo tribuuntur. Sanè in cap. i. libri III. Esdræ, apocryphi quidem, sed in re historica non contemnendi, ex veteri translatione Latina, Ioachas iste Iechonias dicitur, quemadmodum in Græco codice quem Euthymius laudat: quamvis in editione Græca Aldina legatur *Ioachaz*, quæ lectio videtur recentior, & glossematis vice ad marginem posita, irrepsisse in tex-
tum. Vnde asseri posse videtur non absurdè duos Iosiacum liberos, Iechonias dictos.

Secundum Iechoniam, filium primi, ponit Euthymius, genitumque, post transmigrationem, Babylone; quò Ioachaz sive Iechonias ex Ægypto translatus

fuerit à ducibus Nabuchodonosoris , post
subactos Ægyptios.

Ex hac commentatione Euthymii pa-
lam est nullam illum in textu Matthæi la-
bem animadvertisse , sed omnino secutum
& interpretatum eandem quæ hodie extat
contextus lectionem. Quare non erat cur
auctor iste ab eruditis traheretur in par-
tes , ac si corruptum & mendosum lo-
cūm deprehendisset. Ceterūm in eo quod
duos Iechonias , patrem , & filium , fuisse
observat , planè laudandus ; carpendus ta-
men quod Ioachazum in terram Babylo-
nicam adductum , patrem Iechoniæ se-
cundo affingat. Hic enim Ioachaz , ulci-
cente numine , & comiminante per Iere-
miam prophetam cap. xxi. his verbis ,
non revertetur huc amplius , sed in loco ad
quem transtuli eum , ibi morietur , in Æ-
gypto moram perpetuam egit & obiit ,
ut traditur lib. v. Reg. c. xxxiii.

XXXIX. Tot veterum patrum te-
stimoniis fultus non dubito pronuntiare ,
ut initio monui , & sanum esse Matthæi
contextum , tum Iechoniam primum eun-
dem esse cum Ioakimo Iosiac filio , & Ie-
choniam secundum esse filium primi , Io-
siaque nepotem. Placuit tamen erudito
viro Possino in secunda & tertia classe
de uno eodemque agi Iechonia , coque

Iosia^e nepote, Ioakimi filio. Quam ille sententiam eo præcipuè nomine proposuit ut adversus opinionem receptam illibatum & integrum præstaret Matthæi codicem. in quo comprobando feliciter laboravit. Sed eadem felicitas eum destituit, ut puto, in singularis Iechoniæ conjectura, quam hæc incommoda sequuntur. Primum est, omissum à Matthæo Ioakimum Iosia^e filium: cuius silentii causa nulla reddi potest quæ plures quoque Reges non involvat qui ob impietatem hac quoque oblivionis mulcta damnandi erant. Secundum est robustius, assignatos Ieconiæ secundo fratres, qui nullos habuit; cùm è contrario Ioakimo duo fratres fuerint, Ioachaz, & Sedecias, qui regno potiti sunt. Neque est quòd novo & inusitato loquendi modo fratres Iechoniæ dictos putemus, tūm illius patrem Ioakimum, tūm Sedeciam patrūm, quia ejusdem regni participes fuerunt. Tertium idque gravissimum incommodum est, vis illata verbis scripturæ; quæ, hac explicazione admissa, una eademque voce duplē significationem exprimit, naturalem & genuinam unam, alteram verò tralatitiam, *Iosias genuit Iechoniam & fratres ejus*, juxta istum interpretandi modum, genuit verè & naturaliter Ioakimum

& Sedeciam, nepotem verò suum Iechoniam regni reliquit heredem. Quartum ex hac sententia sequitur incommodum, nempe non constare rationem quatuordecim generationum in tertia classe, si Iechoniæ capite minuatur. quod necessum est, si unus ponatur Iechonias, seu is Ioachimus fuerit, sive ejus filius, qui secundæ classi jam imputatus est. Expendimus qua solertia conatus sit Augustinus isto expedire nodo, sed infeliciter, ut diximus.

XL. Molestè autem habuit hæc difficultas supputandi Chrysostomum apud Euthymium, cuius auspiciis plerique Græcorum interpretum, qui duodecim tantum generationes in hac tertia classe differtè expressas legebant, transmigrationis statum unius generationis vice computarunt, absurdè, & Christi personam; unde quatuordecim summam collegerunt. Et rectè quidem, quod attinet ad Christum, ex aperta mente Matthæi; qui quatuordecim generationes in prima classe ab Adamo usque ad Davidem, & totidem in secunda classe à Davide usque ad Iechoniam numerans, Davidem & Iechoniam in numero includit. Vnde sequitur quatuordecim generationes tertiacæ classis designatas usque ad Christum, ejusdem vo-

cis usurpatione , h̄ic Christi personam , ut reliquias duas in limitibus duarum classium superiorum positas , includi , non autem excludi ; licet vox *usque* vim habeat excludendi æquè ac includendi , prout rei argumentum exigit .

X L I . Diversam à ceteris viam ingreditur doctissimus Possinus , & numerum quatuordenarium implet , præter Iosephum , Maria Christi matre computata ; ut pote quæ sola , absque viri Iosephi confortio , partum illum ediderit . Sanè moris non fuit apud Iudæos ut feminæ in genealogiis censerentur . Sed respondet ille moris quoque non fuisse ut virgines parerent , & ortum singularem ex sola femina id exigere ut in serie genealogiæ matris nomen ponatur . Isthoc argumento egregiè probat consultò & necessariò à Matthæo mentionem Mariæ factam in origine Christi ex ea nati , non autem ex Iosepho . Enimverò non est consequens Mariæ personam pro una generatione accipiendam , distincta & separata à Iosephi ejus viri persona . Iungenda est mentio amborum conjugum , juxta mentem Matthæi , ut persona Christi generata dicatur ; à Maria quidem naturali modo , à Iosepho autem vi legis , quæ patrem eum sciscit quem nuptiæ demonstrant . Id quidem omnibus

generationibus commune est , ut filius ex patris & matris connubio prodeat , qui unius generationis sunt auctores . Quare si Saram uxorem Abrahami posuisset Matthæus , genitus ex illis nuptiis Isaac una generatione diceretur , non autem duabus ; nec inter illius majores Sara computaretur ad geminandum generationis numerum , sed ad designandos ex utroque latere Isaaci majores . Eadem ratione Iosephus & Maria connubio juncti , unius generationis numerum conficiunt ; licet novo quodam & singulari privilegio , quo ceteris generationibus antecellit . Quæ causa fuit Matthæo ut Mariæ meminerit in ista descriptione , cujus partes in hoc ortu potiores erant quam Iosephi . Attamen ita meminit ut simul adnotaret Iosephum fuisse virum Mariæ , ex qua natus est Christus ; scilicet ut disceremus unicæ illius generationis duos quidem esse parentes , ut accedit in ceteris , ita tamen ut Iosephus pater esset jure connubii , Maria jure naturæ .

XLI. Tertia restat quæstio de nomine Cainani secundi , quod inter Abrahami majores Arphaxadum & Salem infimum exhibent codices Lucæ ; cum tamen in Geneseos & Paralipomenon libris Hebraicis & Latinis , & apud Iosephum , om-

nino prætermissum sit. Qui Cainanum apud Lucam tuentur, adhibent LXX. interpretum auctoritatem, qui Cainani junioris Arphaxadum patrem & Salem filium memorant. Attamen certum esse debet apud eruditos, ut copiosè & eleganter ostendit Possinus, in antiquis codicibus LXX. præteritum hunc Cainanum; ut colligi potest ex Theophilo Antiocheno, ex Chronico Græco Eusebii apud Scaligerum, & ejusdem Chronico Latino emendato: qui auctores cùm rationes LXX. sequi se profiteantur, insitio Cainano omisso, Arphaxadum patrem Sale docent. idemque tradit Hieronymus, juxta interpretum illorum fidem.

XLI. Ceterū accidit ut LXX. editio hac in parte, ut in plerisque aliis, depravata olim fuerit, & subditius iste Cainanus in eam intrusus. quam labem Procopius Gazæus deprehendit sua tempestate. Ait enim in Hebraïca veritate haberí Salam genitum esse ab Arphaxado: *Quæ verò in medio ponuntur, (scilicet Cainani nomen) obelisco signata esse.* Scimus autem, ex Hieronymo in præfatione libri xvi. in Iosiam, quæ obelo confixa erant, nec in Hebraicis neque in LXX. codicibus haberí, sed tantum in ea editione quæ coimunis appellabatur. Vnde

colligi potest à Theodotione inventum Cainanum istum juniorem , licet lxx. interpretibus incognitum. Quæ causa fuit Epiphonio in Panario , *ad hæresim v. Melchisedecianorum* , hunc Cainanum expungendi juxta fidem lxx. cùm tamen alibi eum agnoscat pro Arphaxadi prole , nempe initio operis adversus hæreses & in fine hæresis lxi. adversus Manichæos , & in fine Anchorati : ubi sine dubio sequitur editionem communem cum isthac insitione Cainani , quæ est à Theodotionis manu. Hanc conciliandi secum Epiphonii rationem sequi malo quam tot loca , quæ meminere Cainani , à descriptoribus corrupta comminisci , ut placuit eruditis qui- busdam.

Ex hac disputatione colligitur , cùm nec in codicibus Hebræis nec apud lxx. editionem Cainani mentio reperiatur , fieri non potuisse ut à Luca in descriptione sua infereretur. Quare in vetustissimis Lucæ codicibus duobus ante mille ducentos annos descriptis , qui hodie apud Angliam asservantur , quorum alter è Lugduno avectus , alter ex Alexandria devectus in eas oras , Cainani nomen omissum est. sed exscribentium audacia jam olim factum ut ex Theodotionis sive ex communi Geneeos interpretatione petitum Cainanino-

men in Lucæ Græcos codices , ea scilicet opera , ut putabatur , emendandos , intrusum sit . Quod deinde vitium editiones omnes , etiam Latinam antiquam Hieronymo vetustiorem , pervasit .

D I S S E R T A T I O

De adventu Magorum ad Christum , & an Reges fuerint.

TRES præcipuae quæstiones moveri solent circa Magorum adventum , an acciderit antequam salvator sisteretur in templo vel postea , an ex Perside vel Arabia profecti sint , & modus conciliandi narrationem Matthæi cum Luca .

I. Prima conficitur ex verbis Matthæi , qui narrationem ortus Domini , angelorum nuntium , & pastorum officia , nullo alio interjecto , cum Magorum adventu connectit . Deinde ad oppidum Bethlehemi accessisse docet antequam aliorum Dominus diverteret . Hujus argumenti vis ex dicendis detegetur . His adjungi potest vetusta plurium patrum traditio , qui jacentem in præsepio infantem à Magis adoratum scribunt ; licet probabilior videatur eorum sententia qui è stabulo in domum puerperæ opportunam secessisse